

Mid-Day Dogri News Bulletin, 19th April 2025

समे – 12:25

<><><><><><>

Passing Cut Prade

उपराज्यपाल मनोज सिन्हा होरें आखेआ जे एह जम्मू कश्मीर पुलस दी दलेरी ते बहादुरी ऐ जेह्दे कन्नै इत्थें दे लोकें गी भरोसा ऐ जे जम्मू कश्मीर सुरक्षत हत्थें च ऐ। उनें आखेआ जे जम्मू कश्मीर पुलस, फौज, नीम फौजी बल ते सब्बै सुरक्षबल जम्मू कश्मीर गी पूरी आतंक—मुक्त बनाने लेई वचनबद्ध न ते इस भेठा लगातार कारवाई बी जारी ऐ। उपराज्यपाल होरें एह गल्ल गांदरबल च जम्मू कश्मीर पुलस च सिपाहिं दी इक पासिंग आउट परेड दरान किट्ठ गी संबोधत करदे होई आक्खी। इस पासिंग आउट परेड च कुल 438 नमीं भर्थी होए दे नोजवान शामिल हे, जिंदे चा 36 महिला बी हियां। इंदे चा 211 सिपाहिं पैहले एसपीओ दे तौरा पर बी अपनी सेवाएं दित्ती दियां न।

<><><><><><>

Dy. CM

औंदे सोए दी रूतें दरान पानी दी निबिर्घन सप्लाई जकीनी बनाने दे मकसद कन्नै उपमुख्यमंत्री सुरिन्दर चौधरी होरें नौशेहरा हल्के च जल—शक्ति मैह्कमे दे कम्मं काजें दी प्रगति दी समीक्षा कीती। इस बारै जम्मू च लग्गी दी इक बैठक दरान जल शक्ति दे चीफ इंजीनियर होरें दस्सेआ जे इसलै नौशेहरा हल्के च कुल 70 स्कीमां चला'रदियां न। इंदे चा 51 जल जीवन मिशन तैह्त्त 18 यूटी कैपेक्स तैह्त्त ते 1 नाबार्ड तैह्त्त चला'रदियां न। उपमुख्यमंत्री होरें सब्बने सेक्टरें दा योजनाबद्ध जायजा लैने मगरा मुत्तलका अधिकारिं गी निर्देश दित्ते जे इनें स्कीमें मुत्तलका सब्बै कम्म समे सिर पूरा करना जकीनी बनाया जा।

<><><><><><>

CS Tourism

जम्मू प्रांते च सैलसफा गी होर मता बढ़ावा देने दी दिशा च इक महत्वपूर्ण गैह् पुट्टदे होई सैलसफा विभाग नै मुख्य सचिव अटल डुल्लू होरें गी कल इकबैठक दरान इस भेठा इक रणनीतिक रूपरेखा बारे दस्सेआ तां जे खित्ते च सैलसफा च होर मता बाद्धा कीता जाई सकै। बैठक दरान मुख्य सचिव होरें जोर देइयै आखेआ जे सैलसफा आली थाहरें दी बड्डे

पैमाने पर मशहूरी कीती जा। उनें मैहकमे गी किश थाहरें पर पानी पर किशती चलाने सरबंधी राफिटिंग ते पैराग्लाइडिंग गी शुरू करोआने लेई बी आखेआ।

<><><><><><>

Div.Com Jammu

जम्मू दे डिवीजनल कीमशनर रमेश कुमार होरें दो-त्रै रोज पैहले आए दे अंधी झक्खड़ करी होए दे नुक्सान दा कल जायजा लैता ते पुर्नब्हाली दे कम्में दी समीक्षा कीती। बैठक च जम्मू बिजली बंड निगम लिमिटेड दे प्रबंध निदेशक, जम्मू नगर निगम दे कमीशनर, जम्मू प्रांतै दे बक्ख-बक्ख जिलें दे डीसी, बिजली विकास, जलशक्ति ते सरबंधत होरने मैहकमे दे चीफ इंजीनियर ते होर केई अधिकारी बी मजूद हे। डिवीजनल कमीशनर होरें सब्बने जिला विकास कमीशनरें गी निर्देश दित्ता जे ओह पुर्नब्हाली दे कम्में पर आपूं नेड़मीं तक्क रखन ते कन्नै तूफान करी होए दे नुक्सान बारे इक तफसीली रिपोर्ट तैआर करन, तां जे प्रदेश आपदा राहत फंड चा प्रभावतें गी मुआवजा जां राहत दित्ती जाई सकै।

<><><><><><>

JMC

जम्मू नगर निगम दे कमीशनर डॉ. देवांश यादव होरें जम्मू च भारी बरखा ते अंधी झक्खड़ ते तूफान चलने दी पेशगोई गी दिक्खदे होई सब्बने मैहकमे ते मुत्तलक अधिकारिएं गी होई अलर्ट पर रौहने दे निर्देश जारी कीते न। इस्सै सिलसिले च ट्रांसपोर्ट अधिकारिएं गी विशेष हिदायतां दित्तियां गेइयां न जे शिड़के थमां डिग्गे दे दरख्त, खम्बे जां होर कोई मलबा बगैरा तौले गै हटाई दित्ता जा तां जे कोई हादसा पेश नेई आवै। एहदे अलावा इस दरान लोकें दी सहायता लेई 2 हैल्पलाइन नंबर बी जारी कीते गे न— 94697-48042 ते 94193-72824।

<><><><><><>

Property Attached

समाज थमां नशे दी माड़ी कबैतु गी खत्म करने दे मकसद कन्नै उधमपुर पुलस, पुंछ च कुनिया दे मोहम्मद हाफिज दा 7 मरले जमीन बने दा 2 मंजिला रिहायशी मकान अटैच कीता ऐ, जेहदी कीमत तकरीबन 1 करोड़ रपे दस्सी जा'रदी ऐ। डीएसपी मुख्यालय प्रहलाद शर्मा, रेहम्बल पुलस थाने दे एसएचओ इंस्पैक्टर निशात अहमद ते जेसीपीपी टिक्करी थमां पुलस सब-इंस्पैक्टर मनवीर सिंह हुंदे आस्सेआ कीते गेदी तैहकीकात दरान पता लगगेआ ऐ जे एह

संपत्ति गैर कनूनी तौरा पर कब्जाई गेदी जिमीं ही जेहड़ी नशीले पद्धार्थ दी तस्करी थमां कमाए गेदे पैहे कन्नै खरीदी गेदी ही।

<><><><><><>

Photo Exhibition

कला केन्द्र जम्मू च कल 5एं दिनें दी इक फोटू प्रदर्शनी शुरू होई जेहदा विषय रखेआ गेदा ऐ “ट्रिनिटी-अ गुप शो” जेहदा सरिस्ता मन्ने परमन्ने दे फोटोग्राफर चंदन भद्रम शास्त्री हुंदे चेते च कला केन्द्र जम्मू ते जम्मू फोटोग्राफी क्लब-अपर्चर आस्सेआ मिलियै कीता गेदा ऐ। इस फोटू नमैश च केई नामवर फोटो ग्राफरें आस्सेआ खिच्ची गेदिएं चुनिंदा फोटुएं गी रखेआ गेदा ऐ जिंदे च चंदन सुंदर, मोहम्मद अनवर अल नासिर, शिशुपाल, प्रो. अशोक कुमार ते अमरजीत सिंह जांधू प्रमुख न। फोटू प्रदर्शनी दा उद्घाटन संस्कृति विभाग दे प्रधान सचिव बी.एम.शर्मा होरें कीता जिसलै जे कला केन्द्र दे सचिव डॉ. जावेद राही, फोटोग्राफी क्लब अपर्चर दे प्रधान आर.के.गोयल ते प्रो. अशोक कुमार होर बी इस मौके मजूद हे।

<><><><><><>

IPL

आईपीएल क्रिकेट च कल बेंगलुरु च बरखा करी प्रभावत होए दे मैच च पंजाब किंग्स नै रॉयल चैलेंजर्स बेंगलुरु गी 5 विकेटें कन्नै हराई दित्ता। बेंगलुरु नै पैहले बल्लेबाजी करदे होई 14एं ओवरें च 95 रन्ज बनाए। 96 रन्जें दा लक्ष्य पंजाब नै 11 गेंदां बाकी रौहदे गै हासल करी लैता। प्रतियोगिता च अज्ज दपैहरी साङ्ढे 3 बजे अहमदाबाद च गुजरात टाइटंस दा मुकाबला दिल्ली कैपिटल्स कन्नै होग। जदके इक होर मैच च अज्ज संज्ञां साङ्ढे 7 बजे जयपुर च राजस्थान रॉयल्स ते लखनऊ सुपर जायंटस आमने सामने होइन।

<><><><><><>